

REGLUR

um úthlutun styrkja úr Atvinnuleysistryggingasjóði árið 1993.

1. gr.

Á árinu 1993 er stjórn Atvinnuleysistryggingasjóðs heimilt að ráðstafa allt að 500 m.kr. sem sveitarfélög greiða Atvinnuleysistryggingasjóði á árinu, til að styrkja sérstök verkefni á ábyrgð sveitarfélaga til að fjölga atvinnutækifærum í samræmi við reglur þessar.

Reglur þessar ná ekki til styrkja samkvæmt 37. gr. laga um atvinnuleysistryggingar.

2. gr.

Fjárhæð styrks skal vera jafnhá þeim atvinnuleysisbótum, að viðbættu barnaálagi og lífeyrissjóðsgreiðslu, sem ella hefðu verið greiddar þeim einstaklingum sem falla af atvinnuleysisskrá vegna þátttöku í verkefninu.

Annar kostnaður við verkefnið, sem umfram er, s.s. launakostnaður umfram atvinnuleysisbætur, þ.m.t. launatengd gjöld, efniskostnaður, stjórnunarkostnaður, kostnaður við eftirlit og umsýslu, skipulagningu og undirbúning, skal borinn af viðkomandi sveitarfélagi eða vera á ábyrgð þess.

3. gr.

Til að verkefni teljist styrkhæft þarf það að uppfylla eftirtalin skilyrði:

1. Vera til að fjölga atvinnutækifærum í sveitarfélaginu.
2. Vera unnið á ábyrgð sveitarfélags. Framkvæmd verkefnis getur hvort sem er verið á vegum sveitarfélagsins sjálfs eða þriðja aðila.
3. Vera skýrt afmarkað og tímabundið. Verkefnið skal að jafnaði ekki ná yfir lengri tíma en sex mánuði.
4. Vera nýtt viðfangsefni eða verkefni umfram venjuleg umsvif. Hefðbundin viðfangsefni sveitarfélaga, s.s. gatna- og lóðahreinsun, gatna- og holræsalagnir eru ekki styrkhæf nema um sérstakt tíma- og staðbundið átaksverkefni sé að ræða. Heimilt er að styrkja verkefni þar sem samþætt er fræðsla og vinna.
5. Nota vinnuaf á atvinnuleysisskrá í viðkomandi sveitarfélagi. Þeir sem lengst hafa verið á atvinnuleysisskrá skulu hafa forgang að starfi við verkefnið. Verkefni við atvinnusköpun fyrir fólk, sem ekki á bótarétt úr Atvinnuleysistryggingasjóði eru ekki styrkhæf.

4. gr.

Við mat á umsóknum skal stjórn Atvinnuleysistryggingasjóðs veita forgang umsóknum frá sveitarfélögum þar sem atvinnuleysi er alvarlegast.

5. gr.

Sveitarfélög sem hyggjast sækja um styrk samkvæmt reglum þessum skulu senda stjórn Atvinnuleysistryggingasjóðs umsókn þar að lútandi. Með umsókn skulu fylgja nákvæmar upplýsingar um verkefnið s.s. kostnaði við það, framkvæmdaaðila, áhrifum þess á atvinnuástand í sveitarfélaginu ásamt fjárhagsáætlun sveitarfélagsins fyrir árin 1992 og 1993. Jafnframt skulu fylgja upplýsingar um atvinnuleysi í sveitarfélaginu samkvæmt atvinnuleysis-skráningu.

6. gr.

Þegar stjórn Atvinnuleysistryggingasjóðs tekur styrkumsóknir til umfjöllunar og afgreiðslu skulu tveir fulltrúar Sambands íslenskra sveitarfélaga taka þar sæti. Fulltrúar Sambands íslenskra sveitarfélaga hafa atkvæðisrétt eins og aðrir stjórnarmenn þegar styrkumsóknir eru teknar til afgreiðslu.

Kostnaður vegna fulltrúa Sambands íslenskra sveitarfélaga í stjórn Atvinnuleysistryggingasjóðs greiðist af Atvinnuleysistryggingasjóði.

7. gr.

Stjórn Atvinnuleysistryggingasjóðs skal hraða umfjöllun og afgreiðslu styrkumsókna svo sem kostur er. Telji stjórnin frekari upplýsinga þörf skal viðkomandi sveitarstjórn gert viðvart án tafar og tímafrestur gefinn til að skila viðbótarupplýsingum.

Afgreiðslu stjórnar Atvinnuleysistryggingasjóðs skal að jafnaði lokið fjórum vikum eftir að fullnægjandi umsókn hefur borist stjórninni.

8. gr.

Þegar stjórn Atvinnuleysistryggingasjóðs ásamt fulltrúum Sambands ísl. sveitarfélaga hefur fjallað um og afgreitt umsóknir af sinni hálfu skal hún leggja tillögu sína um afgreiðslu umsóknar fyrir heilbrigðis- og tryggingamálaráðherra.

Þess skal freistað að ná samstöðu innan stjórnarinnar um afgreiðslu umsóknar.

Nú verður ágreiningur í stjórninni um afgreiðslu umsóknar og skal þá gerð grein fyrir ágreiningnum í tillögunni til ráðherra um afgreiðslu umsóknar og hvernig atkvæði féllu.

Heilbrigðis- og tryggingamálaráðherra skal að jafnaði innan viku frá því að tillaga um afgreiðslu barst frá stjórninni staðfesta tillöguna eða hafna henni.

9. gr.

Eftir að verkefni hefst, sem stjórn Atvinnuleysistryggingasjóðs hefur samþykkt og heilbrigðis- og tryggingamálaráðherra staðfest skal Atvinnuleysistryggingasjóður greiða styrkfjárhæð með föstum mánaðarlegum greiðslum eftirá þann tíma sem verkefnið stendur yfir.

10. gr.

Stjórn Atvinnuleysistryggingasjóðs skal fylgjast með því að verkefni, sem styrkt er samkvæmt reglum þessum sé framkvæmt með þeim hætti sem ráðgert var.

Komi í ljós að framkvæmd verkefnis sé á einhvern hátt ekki í samræmi við upplýsingar er stjórn sjóðsins heimilt að stöðva greiðslu styrksins.

11. gr.

Kostnaður við verkefni skal færður sérstaklega og haldið aðskilið frá öðrum kostnaði hjá viðkomandi sveitarfélagi eða þeim aðila sem annast framkvæmd verksins á ábyrgð sveitarfélagsins.

Stjórn Atvinnuleysistryggingasjóðs er heimilt að óska eftir því að Ríkisendurskoðun endurskoði bókhald þeirra verkefna sem unnin eru með styrk samkvæmt reglum þessum.

12. gr.

Innan fjögurra vikna frá því að verkefni lýkur skal sveitarfélag senda stjórn Atvinnuleysistryggingasjóðs skilagrein um verkefnið.

13. gr.

Reglur þessar, sem settar eru með stoð í 1. gr. laga nr. 107/1992 um breytingu á lögum um atvinnuleysistryggingar, nr. 96/1990, með síðari breytingum, öðlast þegar gildi.

Heilbrigðis- og tryggingamálaráðuneytið, 27. janúar 1993.

Sighvatur Björgvinsson.

Páll Sigurðsson.